

PINSERI DI PACI

Sti me' pinseri, comu na virrina,
spirtusanu lu tavulazzu di lu tempu
e vannu dritti nfunnu a lu me cori!
Mi sentu cunnannatu
a mòriri appinatu
pi stu disù di paci ca mi struri!
Spiritu scuetu, surdu a lu duluri,
vaju rastuliannu
nta tutti li 'gnuni di stu munnu,
l'urtima faidda di spiranza,
l'urtima muddichedda d'amuri,
l'urtima fedda di curaggiu
pi truvare la forza di luttari,
pi smoviri li genti addurmisciuti
e libirarli di li so' catini!
Pi stu disù di paci ca mi struri
vaju abbanniannu amuri
e vinnu pi li strati
a tutti li figghi di Cainu
calici di chiantu e di sospiri
e soni lamintusi di campani,
no pi vuscarimi lu pani,
ma lu dirittu di ristari ccà
attrappatu a la me terra,
senza scantu di guerra;
pi sucari di li minni

di sta matri ca si chiama Sicilia
lu sucu di la vita.
Pi nutricarimi cu lu latti
di sta pecura zoppa
ca tutti pigghianu a pitrati,
pi campari vicinu a li me' frati
pirchè sugnu fieru di essiri sicilianu.
Pi chissu cu lu cori 'n manu,
finu a quannu campu,
di la me vucca nèsci na palora
ca merita d'essiri ascutata:
paci, paci nta stu munnu,
paci pi sta me terra marturiata!

POVIRA ITALIA

Povira Italia comu si riddutta
lorda di sangu, misira, strazzata;
puru l'Europa ti scappau di sutta
ora ca nun poi mettiri pignata.
A lu lavancu pari ca t'ammutta
na cricca sancisuca e sdisangata
e comu varca ca persi la rutta
a jiri 'n funnu pari destinata.

Pi chiù di quarant'anni allegramenti
senza ritegnu, pisu nè misura
lu ciuri ciuri di li dilynquenti
ti sdisussaru e ti lassaru nura.
E ora ca si parra di tangenti
pari na cosa fatta a cugnintura
ca tutti si dichiaranu nnuccenti...
E tu li teni ancora a manciatura!

E mentri tutti parranu di sbagghiu
lu populinu, chiddu c'ha pagatu
cu lu so sangu e cu lu so travagghiu,
di tassi e contributi è assammaratu.
E nun finisci ddocu lu baccagghiu,
daveru lu mumentu è dilicatu
ca lu governu tagghiu supra tagghiu
ni sta lassannu propriu senza ciatu!

PASQUA 1993

Pasqua è vicina, caru Prufissuri,
e Cristu si prepara a lu Carvariu
chisti su' tempi tristi, tempi duri
pirchè l'umanità sbagghiau binariu.

Ncanciu di siminari paci e amuri
cu tanta d'arruganza spaghia a l'ariu
simenza d'odiu e po' morti e turruri
ntamentri sta calannu lu sipariu...

Mi pari ca ci semu... è quasi l'ura
giustu giustu lu tempu d'un vuccuni
e mentri ognunu aspetta lu so giura

c'ammogghia 'n-tuzzareddu a l'ammucciuni
Cristu chi sapi già di la congiura
proj la facci a l'urtimu vasuni!

*Dedicata con affettuosa amicizia
al Prof. Paolo Messina*

QUANNU PERDI LA MATRI...

Quannu perdi la matri ti n'adduni,
ti pari ca la vita si sculura
e t'addiventa nìura carvuni.
Sutta lu pisu di ssa gran svintura
perdi lu sennu, perdi la raggiuni
e ti ribbelli contru la natura,
lu cori t'addiventa di cartuni
e di lu tempu perdi la misura!

E ti n'adduni a lu campusantu
ca lu silenziu pisa tri cantàri
e ca nun basta tuttu lu to chiantu,
svacanti l'occhi e chissu 'un po bastari.
Ti senti persu tra duluri e scantu
sutta ddi vecchi Chiuppi seculari
t'illudi di vidirla a lu to cantu,
m'appena grapi l'occhi idda scumpari!

La cerchi tra la fudda di l'anziani,
la cerchi 'n ogni 'gnuni e 'n ogni via,
diventa chiù prizziusa di lu pani
e mentri cerchi dici: - matri mia! -
Quannu sunari senti li campani
a l'ura giusta di la virmaria,
li to' pinzeri currinu luntani...
Ntantu lu cori 'n pettu rummulìa.

Lu sangu nta li vini scurri lentu
mentri li manu junci cu pruntizza
e cu 'n-sugghiuzzu ca si fa lamentu
sciogghi lu ruppu di la to amarizza.
T'illudi d'astutari ssu turmentu
nzem'a lu spinnu di na so carizza
jittannu, comu cinniri a lu ventu,
palori nsusizzati di ducizza!

E t'arricogghi càrricu di ciuri
scartannu li chiù beddi e li chiù rari
talii lu so ritratu pi tri uri
però nun t'arrinesi di parrari.
Senti ca ti manca lu so amuri
sai ca nuddu chiù ti lu po dari
perciò ti raccumanni a lu Signuri
chìddu chi sapi a tutti cunurtari!

SARAJEVO 93

Cristiani... Musulmani...
e chi voldiri
chi Sarajevo
s'av'a sdirrupari?
Lu sangu scurri
'n nomu di la firi
svampa lu focu
e nun si po astutari.
Si parra a li cungressi
si prega ad ogni missa
e ntantu Sarajevo
ntamenti si subissa!
Poviru omu, vidi unni si juntu?
Doppu ottumila anni di progressu
nun si canciatu
si sempì lu stessu
e ti ritrovi a lu stessu puntu:
Ipocrita, gilusu e sanguinariu!
Abbannunasti la petra e lu vastuni
assicutannu la tecnologia
e sulu pi sbarcari lu lunariu
t'addutturasti 'n filosofia.
Addivintasti mastru nta la scienza,
t'abbuturasti di grecu e latinu,
ma allurtimata, siddu si ci penza,
eri Cainu e si sempì Cainu!

SIMINANNU PINSERI

Granfi di purpu
strazzanu lu celu;
e li stiddi,
a una a una strapazzati,
càrinu a mari
e affùnnanu astutàti.
Fridda è stanotti,
ciuciulia lu ventu,
e ju, mpalatu a puppa
propriu comu un foddì,
simìnu pinseri mpidugghiati
dintra lu surcu
chi la varca lassa...
Cu lu sapi
si vannu a finiri
tra li scogghi
e nàutru foddì l'arricogghi?

RICORDI...

Mi sentu comu attaccatu
nta 'u cavigghiuni di sta vita
cu na catina fatta di ricordi.
Ricordi amari comu lu feli
e ricordi duci comu lu meli!
Ricordi ca parranu di tia,
amuri miu, di tia e di mia.
Ricordu lu to nomu binirittu,
li manu ca mi ficiru carizzi,
li labbra ca 'un mi pottiru saziari
e li capiddi to', ddi beddi trizzi,
scueti comu l'unni di lu mari.
E dda to vuci china d'armunia
ch'era lu sulì di la vita mia!
Ricordu lu surrisu, li masciddi
e l'occhi beddi, chini di dda luci,
ca facià chiù lustru di li stiddi.
Ricordu, amuri miu, li to' palori
ch'eranu lu cunfortu di stu cori!
Ricordi... ricordi amari e duci,
ricordi d'una sula primavera,
d'un sonnu ca sbanìu tra la bufera!
Ricordi ca mi tennu cumpagnia
nta stu desertu di malincunia!

Ricordi... vampugghi di pinseri
ca fannu acchiana e scinni
tra lu celu e la terra.
Faiddi, muddichi di memoria
ca svummicanu àliti d'eternità,
spini puntuti ca ciùnnanu lu cori,
carizzi di ventu, sfrazzi di luci,
c'alligginiscinu sta pesanti cruci!

SEMU SICILIANI

Cu quali facci, cu quali curaggiu
putemu diri: semu siciliani
quannu Sicilia misa addinucchiuni
dumanna aiutu e nui nun l'aiutamu?
Avenu occhi pi vèdiri e nun videmu
lu chiaccu ca la mpica,
la màzzara nciuriusa
ca la capuzza nfunnu,
sempi chiù nfunnu
nta 'n-mari di fangu!
Avenu occhi pi vèdiri e nun videmu
lu juvu, lu tistali, lu vuccagghiu
ca tennu la Sicilia mpasturata
mpajata a lu carrettu di la mafia!
Siddu ci sunnu figghi di Sicilia
ca ntisiru lu bottu di Capaci,
ca vèttiru lu focu in via d'Amelio,
nun ponnu diri sulu: mischineddi
e jiri avanti comu fussi nenti...
Arrisbigghiativi figghi di Sicilia,
sciugghiti lu battagghiu di la Gancia,
scippati ssa gramigna mmaliditta
ca rùsica li ciuri di sta terra.
Truvati lu curaggiu di parrari
di diri pani pani vinu vinu

strinciti la manu a lu vicinu
e nzemi luttati, luttati
pi fabbricari paci e libirtati!
Dicitu chiari e tunnu a ssi mafiusi
ca nun c'è chiù postu pi la so mattanza
ca la Sicilia aspetta jorna novi
chini di lustrura e di spiranza;
ca li cunigghia addivintaru lupi
e li palummi misiru l'artigghi...
Putemu diri: semu siciliani,
quannu tappamu la vacca a la lupara
quannu rumpemu l'ascia di li boja
quannu dirittu, storia e dignità
(persi da chiù d'un seculu)
tornanu agghiri ccà!

STA MATRI TERRA

Sta matri terra havi centu minni
e miliuna di figghi a nutricari,
pi chissu ngramagghiata di suduri
s'arridduciù 'ccussì comu v'appari:
"terra di mafia e omini d'onuri".
Eppuru, ju vi giuru 'n fedì mia,
ca siddu la viniti a visitari
ntra soni di fiscaletti e marranzani
truvati sfrazzi di na sinfunìa
c'havi 'u profumu di li mègghiu ciuri,
l'amaru-duci di lu primu amuri.

Sta matri terra havi centu minni
e miliuna di figghi a nutricari,
pi chissu tanti troffi di pinseri
ciuriscinu comu cippi di zabbari.
E spissu ncelu acchiana na prijera
pi cògghiri lu nenti c'addisiù,
p'assuppari lu chiantu di ddu figghiu
nchiuvatu ncruci supra lu Carvariu,
p'addumannari rispittusu a Diu
'n-coccu di paci ch'è miricamentu
pi ddi fratuzzi ca nun hannu abbentu.

Sta matri terra havi centu minni
e miliuna di figghi a nutricari,
pi chissu vugghi comu na quarara
e li so' figghi 'n cerca di manciari
firriànu sbannuti pi lu munnu.
Signuri, matri Sicilia aspetta,
stenni li vrazza supra la me terra,
a cu cumanna duna sintimentu,
sfrazzi di luci a cu tantia a lu scuru,
li me' fratuzzi aspettanu dda fora...
duna zuttati a cu s'annàca ancora!

SICILIA

Ju sugnu figghiu
di stu locu santu
di sta Sicilia mia
terra di ciuri,
e 'n versi e 'n prosa
spìssu mi ni vantu
cu 'u cori chìnu
d'affettu e d'amuri.
Cantu l'aranci
cantu li zabbari,
cantu lu sulì
c'allegra lu cori
e cantu la ducizza
di stu mari
e l'accarizzu
cu li mei palori.
Terra di ncanti,
terra di trisòri:
si senti l'amuri
di stu figghiu,
lu jornu chi là morti
m'arricogghi,
cummogghiami amurusa
e fammi dormiri cu tia
lu sonnu eternu.